

**Tempoh Sukar Buat Negara Tahun Ini - Najib
Bernama
Sept 5, 2014**

KUALA LUMPUR, 5 Sept (Bernama) -- Perdana Menteri Datuk Seri Najib Tun Razak berkata tahun ini akan dikenang sebagai tempoh sukar buat negara ekoran kehilangan pesawat Malaysia Airlines MH370 dan tragedi pesawat MH17.

Katanya pada waktu negara berduka dengan kedua-dua tragedi itu, seluruh rakyat Malaysia, terus bersatu padu.

"Sama seperti semua rakyat Malaysia, saya juga bersedih atas kehilangan pesawat MH370 dan MH17, dan saya turut sama berdoa untuk mangsa-mangsa dan keluarga mereka, yang akan kekal dalam ingatan saya," katanya menerusi tulisan terbaharunya bertajuk 'Satu Perjalanan Yang Penuh Makna' dalam blog najibrazak.com hari ini.

Beliau berkata sejak kemerdekaan lagi, rakyat Malaysia telah bersatu padu dan bekerjasama ke arah impian yang dikongsi bersama iaitu untuk memperbaiki kualiti kehidupan dan membangunkan negara.

"Saya percaya, kita boleh terus berjaya mencapai impian yang dikejar bersama selagi kita bersatu-padu, berpandukan nilai-nilai dan kepercayaan yang dikongsi bersama. Saya telah memberikan nama kepada perpaduan dan solidariti ini: 1Malaysia," katanya.

Perdana menteri berkata sejak lima tahun yang lepas, kerajaan berusaha gigih untuk memastikan semangat 1Malaysia dipupuk ke dalam dasar-dasar, yakni seimbang, bertanggungjawab dan merangkumi keperluan setiap rakyat.

Namun, katanya, usaha mendukung konsep 1Malaysia bukanlah terletak atas bahu kerajaan semata-mata, sebaliknya juga menjadi tanggungjawab setiap rakyat Malaysia.

Najib berkata banyak pengalaman yang ditelah lalui sejak penulisan blognya yang pertama pada 19 Sept 2008 dan perjalanan itu sehingga kini cukup bermakna.

Sepanjang tempoh tersebut, beliau terharu dengan maklum balas, dorongan malahan kritikan membina tentang pelbagai isu yang diutarakan oleh rakyat menerusi laman web dan juga platform media sosialnya.

"Saya dapat mendengar suara rakyat Malaysia yang membentuk sebuah komuniti maya yang aktif, dan juga berpeluang untuk berhubung dengan saudara dan saudari secara terus dalam pelbagai isu yang melibatkan pembangunan negara.

"Marilah kita teruskan perjalanan ini, dan untuk tujuan ini, saya telah mengemaskini laman web peribadi saya," katanya.

-- BERNAMA

Copyright © 2014 BERNAMA

Source :<http://www.bernama.com/bernama/v7/bm/newsindex.php?id=1066176>